

# La sera de pustretsch : in maletg della veta purila ord nossa biala Val Tujetsch

Autor(en): **Gadola, Guglielm**

Objekttyp: **Article**

Zeitschrift: **Il glogn : calender dil pievel : annalas per historia, litteratura e cultura romontscha**

Band (Jahr): **9 (1935)**

PDF erstellt am: **27.07.2024**

Persistenter Link: <https://doi.org/10.5169/seals-881243>

## **Nutzungsbedingungen**

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

## **Haftungsausschluss**

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

---

---

# La sera de pustretsch

(In maletg della veta purila ord nossa biala Val Tujetsch.)

*Rem. della redacziun. Quest studi cultural en fuorma de skizza, havein nus scret sin fundament d' in fragment de P. Baseli Berther p. m. sco era sin fundament d' autras notizias cultur-historicas ord la Val Tujetsch.*

Ei va encunter s. Martin. Igl atun ei staus emperneivels, bial' aura e ditg buca neiv. Il graun ei staus setschurius ora stupent sils chischnès; ins ha fatg tgunsch de scuder ed ei ha engarnau pulit, malgrad ch' igl uost veva giu schau suenter empau cul sulegl. Il pastg digl atun ei staus dengrau e per cletg han ils armauls saviu guder ditg quel uonn. Cauras e nuorsas cuostan aunc pauc. Il davos temps han ins saviu far bia emperneivlas lavurs digl atun, che spargna de far la primavera. Ir ad uaul, better ora grascha els mises ed en aclas, trer si zuolc e tscheu e leu ein umens sepostai sper ina muschna per runcar ora quella — buca la pli malnizeivla lavur! Cul far ora jeli va ei era encunter la fin ed ils giuvens ston tener ad a quén las seras, sch' els vulan aunc gidar enzatgi a struclar e litgar jeli. Ins auda aunc tscheu e leu ord in nuegl ni zona isolada la canera dil spatlar glin, nua che sgar-scheivlas figuras stattan davos il pei e smeinan cun vigur la spatla, denton sco detg mo tscheu e leu de quellas, ch' eran s'entardadas ni che levan far quitar, ch' ellas hagien pli bia che las autras. Las biaras han gia daditg regulau naven quella lavur e miran denteren cun veseivla satisfacziun sils biars e bials pops, che vevan dau gronda e liunga lavur, denton bi, alv glin havein nus uonn e lu in entir briec pieun d' jeli sper ina biala partida paun d' jeli, ch' ins veva daditg destinau de dar in ton als vadias ed in ton ad in auter, ch' ins veva mess en avon cuort temps ad engrasch.

Ei era pia stau in bi atun, era in pulit onn en general, andantamein fretg ed ils tiers han ins era saviu vender per prezis ordinaris, buca extravagants, quei buc, mo ei tergeva. Ils purs savevan esser cuntents ed ei fuvan era, mo il temps de s. Martin leventa adina si agens sentiments — ils deivets! Durent igl onn san ins plitost scurlar giu da dies quels patertgaments, ins sa schar ruclar empau e — biars laian era — mo da s. Martin, cheu vegnan ils nuvs el petgen e mintga galant um encuera e sesprova de far ora quels, sinaquei ch' ins sappi teisser vinavon e ch' ei detti ina buna teila. —

---

In dils emprems deivets, ch' il pur de Tujetsch regulescha ei adina il quén ded alp. Il bia la dumengia avon ni grad sunter s. Martin, cheu vegn ei tigliau pustretsch da mintga chischada tier il cautegia e quei ei mintga ga ina sera, che porta empau veta denter ils purs.

\* \* \*

Ei era gl'emprem onn, che las treis chischadas de val Val havevan giu emprau in niev cundrez, de numnadamein pladir ensemen la fumeglia ded alp e de purtar ils cuosts generals ulivamein ensemen. Quei veva era la consequenza, ch' ils personavels de quellas treis chischadas stuevan trer pustretsch ensemen. Quei fuva enzatgei reschniev e schon daditg dumandava in l' auter: „Tgi so nu'ls de Val tillan uonn pustretsch? Tauns umens druva ina pulita stiva!„ — Basta, ina dumengia sunter messa vegn gl'aug Toni, che veva funzionau igl onn ded uonn sco cautegia dils „Signurs“ a casa e di si pils ses: „L'otra dumengia vutan ei taglier pustretsch co tier nus; tschels dus tgauegias hagien memi stretg.“ Las femnas han sco pigliau tema, „nua cavaglier giu da maun taunta gliut!“ Denton las feglias, treis frestgas, bravas mattauns, han dil rest giu bugen quei suten ed han teniu quei per ina honor.

Daferton han ils treis purtgès survegniu las ordras dal paster grond de visar ils personavels e pasturs, mintgin de sia chischada, che la dumengia avon s. Martin vegni tigliau pustretsch tiegl aug Toni — in num che l'entira vallada enconuscheva. Fideivlamein ein ils treis purtgès serendi duront l'jamna ora casa per casa e visau officialmein ils purs. Ils treis buozs spitgavan vess sin la dumengia, pertgei els selegravan buca schi strusch d'astgar comparer per l'emprema gada tier in pustretsch, dal qual els havevan udiu tontas gadas a tschintschond. Dasperas tenevan ils pigns per ina honor d'astgar seredunar cun tons umens.

Tiegl aug Toni havevan las femnas era buca fatg serasontga duront l'jamna ora. Ellas vevan lavau en stiva e stebli ed il zuler, mess si auters uhams, pinau tier aunc in per autras measas, eran sedadas ora per supias e bauns e temprau en buns lamegls ellas cazzolas, pertgei lampas vevan ins da lezzas uras aunc buca dapertut.

La dumengia da gentar ha la familia digl aug Toni giu de tschintschar mo dil pustretsch. Tuts selegravan e tenevan per ina honor de saver retscheiver tons umens, giuvens e vegls. Il pign Battesta, il Benjamin della familia, quinta schon giu davos tgei meisa „ils Signurs“, „ils Magnancs“ ed „ils Purs“ hagien de seser e nua ch' ils pasters e purtgès hagien de star, cun ils quals el leva lu era tener compagnia e manigiava alla finala: „In auter onn scheis vus era ir ad alp mè.“ La mumma pudeva rir, „aber sche té vegnas culla brocca, lu catschain nus puspei anainasé!“ — Las mattauns manegiavan, ch' ils umens duessien ir oz in tec pli baul a perver e lu buca emblidar de

---

purtar questa sera empau pli bia latg a casa. Pertgei saveva mintgin. Era eis ei vegniu fatg giu de tschenar pli baul e de dir immediat suenter ils paternos.

\* \* \*

Ei pudev'esser entuorn las 7. Ei finescha ual de tucchar d'Ave Maria. Ina dellas feglias, la Catrina, ch'era stada a rusari, manegia: „Ussa vegnan ei cun in ièda.“ Igl aug Toni finescha ils „Paternos“ cun aunc dir las s. tschun plagas. Las mattauns dattan aunc ina regulada las measas, supias e bauns, caveglian ina cazoletta on zuler e rugaleschan lur fatgs en cuschina. La mumma sesa sin baun-pegna e seregorda vinavon tut persula de quel e tschel culla corda paternos. Igl aug Toni ha aunc dau in'egliada ella gasetta, ferton ch' il Placi, il mat grond, pren neunavon las stialas ed il carnet dils quèns della chischada. Il Battesta cuora traso vidaneu, mira tras las finiastras, sche negin vegnessi aunc. „Ussa vegn enzatgi!“

E pilver, ei vegnan. Trops e trops de treis e quater ensemen a sediscurend bien e dad ault, sco ei gl'ei moda tier nus. Ils dalunsch ein, sco ordinari, ils emprems: Il Fidel Flurin, il Fidel dils Giachens, il statthalter Peder, Vigieli Peder, Franz Giusep, Gion Martin, tuts vischins de Selva e lu il Sep de Dieni cun els.

„Buna sèra!“ — „Bien onn!“, e l'entira familia fa beinvegni tier nus! „Prendai plaz enzanua!“ — „Co survegnis vus il dètg urden questa sèra, manegia il Fidel Flurin. — „Mu vus stuais vai pazienza cun nus“, manegia la mumma e gl'aug, ch' eran levai si per salidar ils umens. „Vus vais giu gliunsch de vegni ora“. — „Cun quai tgi fo de quella aura, sche s'ei bi ira.“ — E puspei audan ins novas caneras sut casa ed on zuler. E neuadenasi ed en stiva vegnan entiras roschas, umens serius, temprai e bein stampai, umens cun barbas cuortas pauc cultivadas, cun fatschas brestgas, scardalidas dall'aura, umens en lur sempel vestgiu de carpun, cun camischa de lenziel alv sco la neiv e nua ch' il culier ei vid la camischa. Ils biars cun l'usitada capetscha liunga de seida sin tgau cun la gronda miserocla, che tonscha sper l'ureglia seniastra giu tochen sil pèz; ils umens pli vegls cun pintgas capetschas, neras cun tinghelin agrads. E denter quels umens serius era giuvens plein veta e plein forza, cun vestas cotschnas e barbais bein strihai. Era quels portan la capetscha seida, che negin pren giu en stiva. A tuts vegn ei fatg da part della familia digl aug Toni cordial beinvegni e prende plaz. Canera e rueida, sgnoccas e risadas vi e neu detguonda. Tuts eran gie encunaschents, buns vischins e de stupenta luna.

Enteifer ina mes'ura eis ei serimnau ina massa umens, quasi tuts personavels dellas treis chischadas cun lur fideivla fumeglia ded alp. Ei fuva cheu ina entira banda Giachens e Gions: Giachen Antoni, Giachen Giusep, Giachen Fidel, Gion Mihèl, Gion Andriu, Gion Felici, Gion Paul. E lu Vigieli pign, Vigieli della Maria, Lezi dil Farrer, il Cathriner, il Gader, il grond Madlainer,

il grond Stèn, il grond Cavegn, il Giossi pign, Vigieli della Tina Hohà, Gion Antoni dil Stiafen, Toni Hasper, il grond de Mulin, Rest Valentin della Gada, Sep Flurin, Sep Martin, Sep Antoni Paul Mariusch. Basta de quei de 40 personavels e lu de quei de 10 pasturs cumpigliau ils sterlers dellas genetschas, il sterler pign ed il sterler grond.

Pia de quei de 50 umens tiegl aug Toni questa sera, ina dètga partida! Bien che la stiva ed il stébli grond eran ualti spazius; tut ha oreifer plaz. Igl εμπrem audan ins aunc ora enqual vusch singulara, per ex. quella dil Vigieli della Tina Hohà, mo i vegn lu pli e pli viv ed en buca ditg eis ei ina cusseida, sco da gentar de s. Placi on claustra.

Havend tratg ina tarmenta presa, leva il grond de Mulin sin peis e di che tut auda: „Ju fuss dal maini d'entschaiver in' ièda, sinaquai tg'ins sappi ira bien a baud a létg. Damaun stu ju ira sé Cungieri e runar giudora fain a pastg.“

„Té has raschun, nus lain entschaiver“, grescha il cautegia denteren, „i è nuéta memi baud!“

„Sche tut è co, sche vi ju leger giu ils quéns“, cloma gl'aug Toni, in um brac cun ina brava barba grischa“, ju vai era priu ansiamen ils quéns de tshels dus tgaustegia!“

„Gie, fagiai vinavaun“, marmugna il Rest Valentin della Gada, „i o dau las siat!“

„Bien, lu cuschai, tg'in audi“, dian plirs.

#### Quen dell'alp de val Val:

Sco usitau las messas . . . . .	fr.	15.—
Il sterler . . . . .	„	335.—
Igl εμπrem paster grond . . . . .	„	210.—
Il secund paster grond . . . . .	„	125.—
Il tierz paster grond . . . . .	„	115.—
8 sacs sal . . . . .	„	88.80
Tschains per trais pruls . . . . .	„	28.50
Paster pign ha giu . . . . .	„	85.—
L'auter . . . . .	„	45.—
Il tierz . . . . .	„	40.—
Purtgè dils „Signurs“ . . . . .	„	27.—
Purtgè dils „Magnancs“ . . . . .	„	25.—
Purtgè dils „Purs“ . . . . .	„	18.—
Per jeli de cazolas e fildirom . . . . .	„	3.35
Per pinar ils dus scutgès . . . . .	„	6.25
Per metter si in tscherchel silla panaglia	fr.	—80

Notabene: „Ussa fuss ai aunc co quels 6 francs pel donn tg'els pors on fatg; il girau o fatg ora 6 francs, a quels stuain nus piè.“ „Quai daien ils purtgès piè; quels marschanès“, grescha il Vigieli della Tina Hohà, „fagievien lur obligaziun, tochen tge vegnevan giun Scharinas a mavan pels clavaus della

---

gliut enturn a mu fa dagrettas.“ — Ils paupers purtgès ein vi davos pegna e sgratan davos las ureglias.—

„Per posta de 6 francs fagiain nus bètg uiara, quai pudain nus bèn piè“, manegia Gion Felici.

„Tgi vut fa scarvon? Ju sun vegls a vai bètga buna memoria. Quai daien quels dus giuvens lo fa, il pign Hetz a'l Gion Flurin; quels en stai on claustra, son ben fa quai; té Placi sas era gidar“, camonda il cautegia dils Magnancs, il Leci dil Farrer.

„Nus main on stébli; lo vain nus ruaus“, di gl'aug Placi. Pia van els treis on stébli per buca vegnir mulestai de far ora ils quens. Mo en stiva entscheiva ei ussa da camifo.

Ils umens empau sils onns ein entuorn ina meisa e fan politica sur della stad vargada. Plirs ein dil meini de transportar las tegias „Sél Cuélm“ empau pli ensi; auters protestan. Il Giachen Martin dil Scarvon vul far remediar la via dellas pégnas ed era quella dellas pétgas. Sin quei meini rispunda tut da vilau in ord la chischada dils „Signurs“: „Gl'emprem rugalai ils tetgs, tg'ins hagi sélmain sust en létg.“ — Sin quella remarca dat ei ina hazra rueida e quei ch'in sa buc, recloma l'auter.

Vi entuorn in'otra meisa sesa in'entira roscha „Magnancs“. Els prendan neunavon la stiala de latg, in cunti, in rispli e la buorsa. Els reguleschan giu il latg, ch'ei han de ver ni de dar in a l'auter. Mintga crena cuosta 5 raps. Tgi che ha daver survegn 5 raps e tgi ch'ha che manca sto dar 5 raps per crena.

Il sterler, ils pasters gronds e pigns ed ils purtgès sesan giu el cantun sper la pegna cull'onda Tina e sias mattauns e raquentan ad ellas ils pli denievs e las pli bialas praulas ch'els san. Las mattauns pon rir de bien cor sullas storgias e stuccas dil purtgè pign, Tgetgel. Per siu cletg s'el buca presents questa sera. Il Giachen Antoni Gader raschuna: „Quei di ch'il Giossi pign ei vegnius si a chischar, ha ei dau la dètga cumedia. El ha cumandau agl Tgetgel, ch'el deigi ira si ella tegia dils Magnancs e dumandar il scutgè grond de metter en il latg, pertgei ch'i hagian buca curtès uonda! Ils Magnancs han lu detg, che sch'ils „Purs“ hagian ch'ei catschi aschi dil gianter, sche veglien ei pia far quei survetsch — ed han cargau en il cucu e schau portar quel giu tiels purs, mo han aunc dau ad el la cunzina de far avon ina viseta alla chischada dils „Signurs“: ed aschia ein quels chezers vegni de bastardar l'entira busecca.“

Sin quella historia suondan aunc autras pli legras. Tutenina dat il paster grond ina manada al raschioni — ed ussa vegn ei dau la tècca ton de gries, che l'ureglia seniastra de tut las casarinas ha franc e segir entschiet a schular. Il tema principal ei il resti de létg. Il purtgè dils „Signurs“ fa valer, che las mattauns dil Stèn hagian dau si uonn lenzeuls, ch'erien cuntschai tondanavon cun autras scrotas, ch'ins fussi mai vegnius ora tgei toc materia eri propi

---

lenziel e tgei scrottas; la cozza dellas Mihèllas eri aunc mender; lezza veva alla fin della stad tanientamein scarps, che la damaun cu' i sedestadavien, vegnevi il purtgè grond per ordinari tras ina rusna cul tgau, il paster pign cullas combas ed il signun culla bratscha. Propi sco'ls peschs ella reit. Il madrat che las Mariuschas hagien dau si questa stad, eri schubers sco'l scussal de cuschina della „de pors“ de Tschamut. Quei fuss denton aunc stau inà; il pir seigi stau, che las miurs cartevien ch'ei setracti d'ina patgna graschanuorsa, ed hagien fatg pigliola enamiez il madrat. — Dals curtès tschuffs e dallas sadialas cutridas, ch'enqual dils „Signurs“ dettien si, seigi meglier de quescher; lezza descripziun savessi far render da gigin perfin. Quei ch'ils pasters pigns raquentan ussa dallas spisas, che mintga pur porta cu'l vegn si a chischar, gliez ei è buca tut hanau. L'emprema gada cul grond Madlainer ei vegnius si ha'l purtau ina tarmenta „petta cun uettas“, mo els hagien tuts ensemen stuiu magliar de schluppar, avon che vegnir tier in'uetta.

Mo la pli gronda fiasta han ei giu culs tigliarins dellas mattauns dil Toni. Il sterler manegia: „Tgei futra haveis vus autras è fatg lezza ga? In di bein-marvegl vegn vies bab da tegia en e di che sias „buèbas“ hagien lu dau in bien solver oz. El pren neunavon in hazer mantun tigliarins ord la brenta e fa la remarca: per far vegnir pli buns els, ha la mumma dau 20 raps allas buèbas, per schar cumprar e metter en uettas manetlas!“ A nus mavan las sbabas bihurti per la bucca entuorn. Nus dein lu buca maufer vidlunder, mo strusch dau ina lagutida, che tuts fan si ina tschera, sco sch'ei vessan la bucca plein — strighel. Vus stodas zèplas vevas mets en peiver enstagl uettas els tigliarins.“ Quei ei stau ina fatala praula per ellas.

Mintgaton empiara ussa in ni l'auter, sche quels en stèbli hagien buc aunc finiu. Mo lezs ein aunc fitschentai e perquei entscheivan ils purs, magnancs e signurs en stiva in'otra fitschenta,

Ils purs davos las measas han finiu cun igl ulivar il latg e mettan en sac stialas e buorsas. Els han aunc de trer ora in cautegia per chischada sin la proxima stad. Quei dat all'entschatta empau de sestrer, pertgei che negin vul neu — e tuttina eis ei denteren de quels, ch'ei loschs sin quei uffeci. Mo la fin finala reussesch'ei e tut ei cuntents che quei ei vargau. Lu suonda zatgei pli delicat, zatgei ch'ei beinsavens stau il crap de scarpetsch de beinenqual segrida.

Ei vegn numnadamein tratg ord la capiala la chischada, che sto ira en Val Giuf la proxima stad. Ils pursanavels dell'alp val Val ein enconuschentamein parti en treis chischadas: Signurs, Purs e Magnancs. Ina quarta chischada consista ord purs de tuttats treis chischadas e senumna „Bastardada.“ Quellas treis chischadas consistan ord 30-35 purs. L'alp porta circa 180 vaccas. Pér ussa vegn ei propi tigliau pustretsch! Igl esch-stebli sesarva e neuden stiva vegnan ils quintaders, ch'han giu de smaccar beinqual nuschi. Els han

---

buca mo giu de quintar o il quen dellas expensas ; gliez fuss alla finala stau pippas, il pir ei co rabbitschar en pustretsch las intradas!

Culs pors eis ei aschia, che sin mintga duas vaccas ha il pursanavel il dretg de cargar in: quels che survargan in per duas, pagan in franc per piertg. Las midadas vegnan dadas sin mintga duas vaccas ina. Tgi che ha fatg dapli vegni pagau in franc per midada, e quels ch'han fatg memia paucas, ston pagar in franc per ga.

Cura che tut ei stau stediamein en quen, eis ei aunc vegniu quintau ora, con ei tuchi sin mintga vacca e genetscha. Era per la marena han ei tigliau en 15 funs pieun, diesch funs caschiel e 20-25 liters vin. Il Placi fa de saver ch' il quen seigi en uorden: „Nus vain quintau ora tgé vegn scu suonda:

Genetschas 6 francs e 27 raps l'ina

Vaccas 5 francs e 27 raps l'ina.

Tratg giu rubas e strubas restass ei lu aunc ain cassa in plé de 32 francs. Co dund' ju aunc a mintga pastur il rodel, tg'el sappi con e nua tg'el hagi de trar ain. — E dal reminaint, spetg'ju sén propostas tgei paglier a mauns culs 32 francs tge vonzan?“

Il purtgé dils magnancs veva daditg spitgau sin quella nuvialla e cloma perquei tut dad ault: „Ussa main nus pel vin!“

„A da té duess ins dar vin anzanu' auter, té ragner!“ dat il Paul Mariusch in giap denteren. Mo spèrt sissu il Catriner: „Quai vegn dau pellas ulmas, tge té bègn sappies!“

Ils biars denton, cunzun ils magnancs, dattan ina scurlada il tinghelin e fan valer, che cun 10—12 francs per las olmas fussi ina bufatga. Ei vegn votau — e quei meini peglia il pli.

Pér ussa vegn ei propi il legher. Il cautegia camonda als pasters de prender las brentas digl aug Toni ed ira vidoragiu tiella Maria Barla Muggli e far dar 20—25 liters vin. Ils pasters fan buca dir duas gadas e van cullas brentas, sco' l de Medel cu' l ei jus pil sulegl.

Denton peina l'onda Tina il puschegn e sias buèbas rasan tuaglia. Pil scarvon camonda gl'aug Toni de far in bien caffè, pertgei el hagi mal il tgau. Quei ei ver, mo tut che ri cul pauper scarvon de caffè. Ei gl'ei ina tanienta mahoia gliedud en stiva ed els dus stebelis, ch' ils glas de vin pon buca tonscher. Perquei ston las femnas vegnir neunavon cullas miolas bialas, che il bab veva purtau neuasi da Ligiaun in onn d'ina buna fiera. La mumma ei de quei nuota pli ch'inton cuntenza — mo la Catrina ha il bi quét de survir si en quellas bialas miolas de purzellan als mats dils „Signurs“.

En tut ein ei 50 persunas. Era l'onda Tina e sias stupentas mattauns ston tener compagnia. Quei tuts che pretendan: ils signurs, purs, magnancs e bastards. Igl'emprem ein las buobas schenadas, mo i va buca ditg, ch' ellas ein pli che cuntenzas ded esser en quella legra societad.



Mo il puschegn de pustretsch ei persuenter veramein oreifers. Sin tigliors tarlischonts, vegn ei surviu ina pischada melna sc'in aur ed in caschiel fin plein rusneclas e d'ina color „scu piun culau“. Sin auters tigliors meins tarlischonts, mo tuttina sereins sco l'aua de val Val, portan las femnas neuden stiva entiras palunas talgias-pètta e barbalada. Purschend ina detga talgiuna alli purtgè, manegia la Rosa: „Quell' ièda stus té speranza bétga schlupar de magliè avaun tgè vegnir tier in'uetta!“

„Gliez depiand'aun, sch'i è betg ain paiver?“

Sin quei suonda ina risada che las finiastras tremblan. Lu manegia il Viglieli della Tina Hohà: „Té purtgè pign, meritar meritassas té schagliuc nuét. Cons signals os té fatg giu questa stad sél Calmut? Nevetg, quai arda meglier tge la draussa! Té mu trafica usché vinavaun, epi sietta il militer giu tè in dé.“

„Quels lo bèn“, rispunda il frestg mattatschet, „quels on uonda de sitar giu la crappa, numdir lagagier sélla gliut!“

Puspei ina legra risada.

Sin quei tenta il Sep Flurin, il paster pign! „Té tuler lo vigiu el tgantun della maisa, a da té dess ins da mu aua. Contas iédas os té schau ira las vacas a maglié de quei dils tudestgs; tè sas bèn tgeï ch'ju manegia; ils ensolvers dils cotschens d'Ursera?“

Biars pon rir de bien cor; auters fan sco sch'ei sesmerviglassen: „Udis, udis...?“

Il paster pign ei buca de penn e dat prompta risposta: „Vus Sep Flurin duvreis nuéta selamentar pervia de gliez; sche vossa Crutscha - ladra - vess bétga magliau dals tudestgs, vessas vus franc e segir bétga tratg taunta stera. Gliez mu cartai!“

Puspei risadas; il paster grond metta aunc vitier: „Bravo, petta pagada!“

Aschia vegn ei raquintau e ris e puspei ris e raquintau ad in contin. Vonzeivi entscheiva il Rest Valentin della Gada a vegnir leghers e lu han tuts de far uonda mo cun tedlar. Denter bia bialas detgas e praulas, raquenta el oz ina reschnova, era per cudizar in techet il caluster: „Ina gada ei la davosa dunschala de Putnengia vegnida fetg malsauna. Avon che murir ha ella cumandau, ch'ei stoppien satrar ella cun tut siu resti. Era las rintgas ed ils anials d'aur astgien ei buca prender naven. Ell'ei lu morta ed ils ses han fatg sco'lla veva cumandau. Il caluster ha viu ch'ei han mess ella el vischi cun quellas custeivladads. La notg sissu ei el vegnius en sonteri per cavar si la dunschala e prender igl anî d'aur. Cura ch'el ha vuliu prender quel ord il det, ha la dunschala tratg anavos il maun. Il caluster ha pigliau ina stermentusa tema ed ei curius ton sco'l ha pudiu a casa. La dunschala ei è levada si ed ida a casa ed aunc vivida bia dis ed onns.“

---

Tut che muossa interess ed il Rest Valentin della Gada raquenta e raquenta senza trer giud bucca. Tutenina dat ei las dudisch ed in'entira partida seglia sin peis, svid' ô ils glas e fa tschera ded ira.

Mo enaquella camonda il Toni allas femnas de vegnir cul caffè. E neuden vegnan ei cun tarmentas cafetieras de treis peis e ruocuns dil Vigieli Hafner senza fin. Quels feman sco tgamins e derasan in fried de nuir. Capeivel che negin protesta pli encunter ina tala splendida hospitalità. Gnanc il Tèsta buc, il purtgè dils magnancs, che veva buiu bravamein vin e che schemeva buca legher mintgaton: „Mu Dius de miu vianter!“ Il caffè ha denton scapantau il schani e fatg bein a tuts.

Ei dat l'ina ed ussa ha ei num ir a casa. Mo avon engrazia il cautegia dils magnancs, il Lezi dil Farrer, en in cuort plaid, er en num dellas outras chischadas al Toni ed alla Tina — e fagend profunda reverenza — era allas treis frestgas mattauns, che hagian fatg honor oz a lur vegls. El plaidi segir en num de tuts ils presents, sch'el exprimi gia oz il giavisch e la speranza de puspei saver tigliar pustretsch in'auter onn ella medema stiva ed en medema paisch e harmonia.

Cun quels plaid van ils pursanavels encunter casa, havend dau il maun agl aug Toni ed all'entira respectada familia.

„Mu sche Dius partgiri e sin savasai in'auter onn!“

---

Cuera, per s. Mihèl, 1934

Guglielm Gadola